



还
 来
 流
 並
 所
 卷之五
 六

柳田文庫
 文庫11
 D 62
 3



文庫 11
D 62
3

釋迦譜卷第五

蕭 齋 釋 其 法 僧 祐 撰 撰 誤

釋迦降生釋種成佛緣譜第四之五出因
爾時世尊又於他日入指池而自洗浴洗浴訖已心
念欲出無所攀持池上有樹名迦羅迦枝葉蔚映臨
於池上樹神即便按此樹枝令佛攀出還坐樹下于
時迦葉來至佛所忽然見樹曲枝垂蔭怪而問佛此
樹何故曲枝垂蔭佛即答言我於向者入池洗浴出
無所攀樹神致感為我曲之於是迦葉見樹曲枝又
聞佛言歎未曾有而自心念年少沙門乃有如此大

支那

釋迦譜卷五

一

釋迦

010190551607

威德力能感樹神然故不如我道真也

爾時迦葉心自念言明日摩竭提王及諸臣民婆羅門長者居士等當來就我作七日會年少沙門若來在此國王臣民婆羅門長者居士等見其相好及以神通威德力者必當捨我而奉事之願此沙門於七日中不來我所佛知其意即便往詣北鬱單越七夜停彼不見過七日已集會訖畢國王辭去迦葉心念年少沙門近於七日不來我所善哉快哉我今既有集會餘饌欲以供之其若來者善得時宜於是世尊即知其意從鬱單越譬如壯士屈伸臂頃來到

其前于時迦葉忽見如來心大驚喜即問佛言汝近七日遊行何處而不相見佛即答言摩竭提王及諸臣民婆羅門長者居士於七日中就汝集會汝近心念不欲見我是故我往北鬱單越以避汝耳汝今心念欲令我來所以今者故來詣汝迦葉聞佛說此言已心驚毛豎而作此念年少沙門乃知我意甚為奇特然故不如我道真也

爾時世尊又於他日心自思惟優樓頻螺迦葉根緣漸熟今日正是調伏其時思惟是已即趣尼連禪河既到河側是時魔王來詣佛所而白佛言世尊今者

宜般涅槃今者宜般涅槃何以故所應度者皆悉解脫今者正是般涅槃時如是三請世尊爾時答魔王言我今未是般涅槃時所以者何我四部眾比丘比丘尼優婆塞優婆夷未其足故所應度者皆未究竟諸外道眾悉未降伏爾時如來亦復三答魔王聞已心懷愁惱即還天宮世尊即便入尼連禪河以神通力令水兩開佛所行處步步塵出使兩面水皆悉涌起迦葉遙見謂佛沒溺即與弟子乘船而來既至河側見佛行處皆悉塵起歎其希有而自念言年少沙門雖有如此神通之力然故不如我道真也是時迦

葉即問佛言年少沙門欲上船不佛言甚善于時世尊即以神力從船底入結加趺坐迦葉見佛從船底入而無穿漏歎其希有心自念言年少沙門乃有如是自在神力然故不如我得真羅漢也

瑞應本起云如是變化凡有十八迦葉復念是大沙門神則神矣然不如我以得羅漢也佛即語言迦葉汝非羅漢亦復非是阿羅漢道汝今何故起大我慢瑞應本起云佛語迦葉汝非羅漢不知道證胡為強顏不知羞恥虛妄自稱我有道德於是迦葉心驚毛豎慚愧無顏自知無道即稽首言今大道人實妙神

聖乃知我意迦葉聞說如此語時心懷愧懼身毛皆豎而自念言年少沙門善知我心卽白佛言如是沙門如是大仙善知我心唯願大仙攝受於我佛卽答言汝旣年老百二十歲又復多有弟子眷屬又爲國王臣民所敬若欲決定入我法者先與弟子熟共論詳迦葉答言善哉善哉如大仙勅然我內心非不決定爲當還與弟子論耳作此語已卽還本處集諸弟子而語之言年少沙門住此以來見其種種神通變化極爲奇特智慧深遠性又安詳我今便欲歸依其法汝等云何弟子答言我等所知皆尊者恩年少沙

門旣爲尊者之所歸信豈當有虛我等亦見有諸奇異尊者若欲必受其法我等亦願隨從歸依于時迦葉聞諸弟子作是言已卽便相與俱詣佛所而白佛言我及弟子今定歸依惟願大仙時攝我等佛言善來比丘鬚髮自落袈裟著身卽成沙門爾時世尊卽隨所應廣說四諦于時迦葉聞說法已遠塵離垢得法眼淨乃至漸漸成阿羅漢果爾時迦葉五百弟子旣見其師已爲沙門心生願樂亦欲出家卽白佛言我等大師已爲大仙之所攝受今成沙門我等亦樂隨大師學唯願大仙聽我出家佛言善來比丘鬚髮

自落袈裟著身卽成沙門於是世尊卽爲轉於四諦法輪時五百弟子遠塵離垢得法眼淨成須陀洹果漸漸修行乃至亦得阿羅漢果爾時迦葉及五百弟子以其事少種種之具悉皆捐棄尼連禪河師徒相與隨佛而去爾時迦葉二弟一名那提迦葉二名伽闍迦葉各有二百五十弟子在尼連禪河側居於下流忽見其兄并及弟子所事火具悉逐流來心大驚愕而自念言我兄今者有何不祥事火之具今隨水流將非惡人之所害也是時二弟奔競相就而共議言我兄今者若復不爲惡人所害諸物何緣從水而

來苦哉怪哉我等宜速共至兄所卽便相與逆流而上至兄住處空寂無人心大悲絕不知其兄及諸弟子之所在處四向推尋遇見舊人而問之言我仙聖兄及諸弟子不知所在汝見之不舊人答曰汝仙聖兄與諸弟子棄事火具皆悉往於瞿曇之所出家學道是時二弟聞此語已心大懊惱怪未曾有又自念言云何棄於阿羅漢道而復更求他餘法也卽便馳往至其兄所到已見兄并及眷屬剃除鬚髮身被袈裟卽便跪拜而問兄言兄本旣是大阿羅漢聰明智慧無與等者名聞十方莫不宗仰何故於今自捨此

道還從人學此非小事爾時迦葉答其弟言我見世尊成就大慈大悲有三事奇特一者神通變化二者慧心清徹決定成就一切種智三者善知人根隨順攝受以此事故於佛法中出家修道我今雖復國王臣民所見宗敬世論機辯無能折者然非永斷生死之法唯有如來所可演說能盡生死既值如是太聖之尊而不自勵師彼高勝則是無心亦為無眼二弟白言若如兄語決定是成一切種智我所知得皆是兄力兄今既已從佛出家我等亦願隨順兄學即各語其諸弟子言我今欲同太兄於佛法中出家修道

汝意云何時諸弟子即答師言我等所以得有知見皆大師恩大師若欲於佛法中而出家者亦願隨從於是那提迦葉伽闍迦葉各與二百五十弟子至於佛所頭面禮足而白佛言世尊唯願慈哀濟度我等佛言善來比丘鬚髮自落袈裟著身即成沙門時那提迦葉伽闍迦葉又白佛言我諸弟子今皆欲於佛法出家唯願世尊垂愍聽許佛即答言善哉善哉爾時世尊便呼善來比丘鬚髮自落袈裟著身即成沙門爾時世尊即為那提迦葉伽闍迦葉及諸弟子現大神變又應其心而為說法語言比丘當知世間皆

為貪欲瞋恚愚癡猛火之所燒炙汝等往昔奉事三
 火既能絕棄除此外惑今三毒火尚猶在身宜速滅
 之時諸比丘聞佛此語於諸法中遠離塵垢得法眼
 淨世尊又為說四諦皆得阿羅漢果。

爾時世尊心自念言頻婆娑羅王往昔於我有約誓
 言若道成者願先見度今日時至宜應往彼滿其本
 願作此念已即與迦葉兄弟及千比丘眷屬圍繞往
 王舍城諸頻婆娑羅王所爾時頻婆娑羅王昔以聚
 落給優樓頻螺迦葉者既見迦葉及其弟子悉為沙
 門即還啓王說如此事王與諸臣既聞此語心大驚

怪默然無聲時外人民聞此語已各相謂言優樓頻
 螺迦葉智慧深遠無與等者年又耆老已得阿羅漢
 云何反為瞿曇弟子終無此理乃可說言沙門瞿曇
 為弟子耳爾時世尊漸近王舍城住於杖林時優樓
 頻螺迦葉即便遣其常所使人白頻婆娑羅王言我
 今於佛法中出家修道今隨從佛來至杖林大主宜
 先禮拜供養王聞來信說此言已方決定知優樓頻
 螺迦葉為佛弟子即勅嚴駕與諸大臣婆羅門及人
 民眾往詣佛所至杖林外王即下輦除去儀飾出至
 佛前爾時空中有天而語王言如來今者在此林中

是諸天人最上福田大王宜應恭敬供養又應宣示國中人民皆悉令其供養如來時王既聞彼天語已心大歡喜倍增踊躍普曜經云時餅沙王聞之欣然大悅吾本共要得佛相度勅諸大臣長者梵志國中吏民嚴治道路散華燒香持諸幢蓋王乘羽葆之車大臣百官前後導從千乘萬騎長者梵志萬二千人欲出城迎忽大風起閉其城門王怪所以今行迎佛當有吉喜快善瑞應時城門神即謂王言快無不利王往前世與八萬四千王治寺起塔誓言於來世一時見佛諮受道教今有一人閉在刑獄違其本誓故

城門閉當放大赦獄中人出同時見佛諮受訓誨城門乃開王聞乃遣速勅詔放大赦境土獄囚得出一時往迎時佛入國有大社樹名曰遮越佛與比丘坐樹下王遙見佛如星中月猶如日出天下大明靡不照耀亦如帝釋梵王聖帝處於本宮如樹率茂晃若金色威神特顯光明巍巍超絕無侶王心踊躍下車步進五體威儀除蓋履扇冠幘刀杖前稽首佛足自稱其號我是國主餅沙王也久服聖尊饑虛積時如是至三佛告王曰實如來言是王餅沙也諸佛天神皆護王身王曰蒙祐退坐一面前者作禮中者低頭

後者又手皆却坐訖王及臣民觀優樓迦葉在山學
仙者舊來久怪之佛邊心自念言佛是優樓師優樓
是佛師乎佛觀心念即告優樓為說偈言

云何優樓卿

本可所事神

祠祀歸水火

日月眾梵天

事來為幾何

夙夜精進學

心中不懈廢

寧益致神仙

於時迦葉以偈報佛

自念祠祀來

以歷八十年

奉風水火神

日月諸山川

夙夜不懈廢

心中無他念

至竟無所獲

值佛乃安寧

王及羣臣國中萬民爾乃別知優樓迦葉是佛弟子
便進林中遙見如來相好莊嚴又見優樓頻螺迦葉
兄弟三人并其弟子前後圍繞如盛月滿處眾星中
行步踊悅不能自勝既至佛所頭面禮足而白佛言
我是月種摩竭提王名頻婆娑羅世尊知不佛即答
言善哉大王於是頻婆娑羅王却坐一面時婆羅門
及以大臣諸人民眾皆悉就坐爾時世尊既見來眾
皆安坐已即以梵音慰問頻婆娑羅王言大王四大
常安隱不統理民務無乃勞耶王即答言蒙世尊恩
幸得安隱爾時頻婆娑羅王及餘大學婆羅門長者

居士大臣人民既見迦葉為佛弟子自相謂言嗚呼
 如來有大神力智慧深遠不可思議乃能伏於如此
 之人以為弟子爾時復有諸餘人眾心自念言優樓
 頻螺迦葉有大智慧普為世人之所歸信云何當為
 沙門瞿曇而作弟子心懷狐疑爾時世尊知彼心念
 即語迦葉汝今宜應現諸神變于時迦葉即昇虛空
 身上出水身下出火身上出火身下出水或現大身
 滿虛空中或復現小或分一身為無量身或現入地
 還復踊出於虛空中行住坐臥舉眾見已歎未曾有
 悉皆稱言第一太仙爾時迦葉現此變已即從空中

到於佛前頭面禮足而白佛言世尊實是天人之師
 我今實是世尊之弟子如是三說佛即答言如是如
 是迦葉汝於我法見何等利棄捨火具而出家也於
 是迦葉以偈答言

我於昔日中	受於五欲樂	我見此過患	得生天人中	又復事火福	必有老病死
所事火功德	恒如是輪轉	所以棄捨之	增長貪恚癡	為求將來生	已見如此事
得生天人中	沒於生死海	又復事火福	是故我遠離	既已有生故	是故棄火法

施會修苦行 乃以事火福 雖得生梵天
 此非究竟處 以是因緣故 所以棄事火
 我見如來法 離生老病死 究竟解脫處
 是故今出家 如來真解脫 為諸天人師
 以是因緣故 歸依大聖尊 如來大慈悲
 現種種方便 及諸神通力 而以引導我
 云何而復應 奉事於火法
 爾時頻婆娑羅王及諸大眾聞優樓頻螺迦葉說此
 偈言心大歡喜於如來所深生敬信決定得知如來
 必成一切種智審知迦葉是佛弟子爾時諸天於虛

空中雨眾天華作妙妓樂異口同音唱言善哉優樓
 頻螺迦葉快說此偈爾時世尊知諸大眾心意決定
 無復狐疑又觀其根皆以成熟即為說法大王當知
 此五陰身以識為本因於識故而生意根以意根故
 而生於色而此色法生滅不住大王若能如是觀者
 則能於身善知無常如此觀身不取身相即能離我
 及於我所若能觀色離我我所即知色生便是苦生
 若知色滅便是苦滅若人能作如此觀者是名為解
 脫若人不能作斯觀者是名為縛法本無我及以我
 所以倒想故橫計有我及以我所無有實法若能斷

此倒惑想者卽是解脫爾時頻婆娑羅王心自思惟
 若謂衆生言有我者而名爲縛一切衆生皆悉無我
 既無有我誰受來報爾時世尊知彼心念卽語之言
 一切衆生所爲善惡及受果報皆非我造亦非我受
 而今見有造作善惡受果報者大王諦聽當爲王說
 大王但以情塵識合於境生染累想滋繁以是緣故
 馳流生死備受苦報若於境無染息其累想卽得解
 脫以情塵識三事因緣共起善惡及受果報更無別
 我譬如鑽火因手轉燧得有火生然彼火性不從手
 生及以燧出亦復不離手及燧鑽彼情塵識亦復如

是時頻婆娑羅王又自思惟若以情塵識和合故而
 有善惡受果報者便爲常合不應離絕若不常合是
 卽爲斷爾時世尊知王心念卽便答言此情塵識不
 常不斷何以故合故不斷離故不常譬如緣於地水
 因彼種子而生芽葉種子旣謝不得名常生芽葉故
 不得名斷離於斷常故名中道三事因緣亦復如是
 爾時頻婆娑羅王聞此法已心開意解於諸法中遠
 塵離垢得法眼淨八萬那由他婆羅門大臣人民亦
 於諸法遠塵離垢得法眼淨九十六萬那由他諸天
 人又於諸法遠塵離垢得法眼淨時頻婆娑羅王卽

從座起頂禮佛足合掌白佛快哉世尊能捨轉輪聖王之位出家學道成一切種智我昔愚癡欲留世尊臨治小國今觀慈顏又聞正法方懷慚愧追悔昔過唯願世尊以大慈悲受我懺悔我於昔日白世尊言若得道時願先度我今日始蒙宿願成遂荷世尊恩得履道跡我從今日供養世尊及比丘僧當令四事不使有乏唯願世尊住於竹園令摩竭提國長夜獲安佛即答言善哉大王乃能捨於三不堅法求三堅報當令王願得滿足也時頻婆娑羅王知佛受請住竹園已頂禮佛足辭退而去普曜經云大臣賀王前

時諸王悉不見佛今獨王見宿福祿厚故乃爾耳王益欣踊亦賀諸臣卿等大德值是聖尊王還宮中勅宮夫人媵女大小及國吏民歲三月六齋守禁法施戒博聞王適歸官時天帝釋將八萬天散華佛上歸命作禮而去言南無佛尋皆悉度得法眼淨時摩竭國有一長者名曰迦陵見佛入國天人所奉而無精舍我有好園欲用上佛往詣佛所稽首足下前白佛言佛愍一切如親愛子棄轉輪王不慕世榮今無精舍有一竹園去城不遠願以奉佛可作精舍佛受祝願佛及聖眾遊處其中是故名曰迦陵竹園

王還城已即勅諸臣今於竹園起諸堂舍種種莊飾極令嚴麗懸繒旛蓋散華燒香悉皆辦已即便嚴駕往至佛所頭面禮足而白佛言竹園僧伽藍修理始畢唯願世尊與比丘僧哀愍我故往往彼也爾時世尊與諸比丘及無量諸天前後圍繞入王舍城當於如來蹈門闢時城中樂器不鼓自鳴門狹更廣門下更高一切丘墟皆悉平坦臭穢塵垢自然香淨聾者得聽瘖者能語盲者得視狂者得正拘躄疾病普皆除愈枯木發華腐草榮秀澗池增瀾香風清靡鳳雀孔翠鳧鴈鴛鴦異類衆鳥繽紛翔集出和雅音有如

是等種種祥瑞既入城已與頻婆娑羅王俱往竹園爾時諸天滿虛空中時王即便手執寶餅盛以香水於如來前而作是言我今以此竹園奉上如來及比丘僧唯願哀愍為我納受作此言已即便奉捨爾時世尊默然受之說偈呪願

若人能布施	斷除於慳貪	若人能忍辱
永離於瞋恚	若人能造善	則遠於愚癡
能具此三行	速至於涅槃	若有貧窮人
無財可布施	見他修施時	而生隨喜心
隨喜之福報	與施等無異	

爾時婆羅門大臣及餘人民見王奉施如來僧伽藍皆悉踊躍生隨喜心爾時頻婆娑羅王施僧伽藍已心大歡喜頭面禮足退還所住閻浮提中諸王見佛頻婆娑羅最為其首諸僧伽藍竹園僧伽藍最為其始爾時世尊與諸比丘住竹園僧伽藍于時王舍城中有二婆羅門聰明利根有大智慧於諸書論無不通達辯才語議莫能摧伏一姓拘栗名優婆塞沙母名舍利故舉世喚為舍利弗二姓目犍連名目犍羅夜那各有一百弟子普為國人之所宗仰二人互共以為親友極相愛重咸共誓言若先得聞諸妙法者

要相開悟無得吝惜

爾時阿捨婆耆比丘著衣持鉢入村乞食善攝諸根威儀詳序路人見者皆生恭敬時舍利弗忽於路次逢見阿捨婆耆善攝諸根威儀詳序彼舍利弗善根既熟見阿捨婆耆心大歡喜踊躍徧身停步瞻視不能暫捨即便問言我意觀汝似新出家而能如此攝諸情根欲有所問唯願見答汝今大師其名何等有所教誡演說何法時阿捨婆耆即便安詳而答言我之大師得一切種智是甘蔗種姓太人之師相好智慧及神通力無與等者我既年幼學道日淺豈能宣

說如來妙法然以所知當為汝說即說偈言

一切諸法本 因緣生無生 若能解此者

則得真實道

時舍利弗聞阿捨婆耆說此偈言即於諸法遠塵離垢得法眼淨見道跡已心大踊躍身諸情根皆悉悅豫而自念言一切眾生悉著於我所以輪迴在於生死若除我想即於我所亦皆得離譬如日光能破於暗無我之想亦復如是悉能破於我見暗障我從昔來所可修學皆為邪見唯今所得是真正道作此念已禮阿捨婆耆足歸還所止時阿捨婆耆至前乞食

訖還竹園時舍利弗還至住處時目犍連夜那善根已熟見舍利弗諸根寂定威儀詳序顏容怡悅異於常日即便問言我今觀汝諸根顏貌與常有異必當已得甘露妙法我昔與汝共結誓言若聞妙法要相啓悟汝有所得願為我說時舍利弗即便答言我今實已得甘露法目犍連夜那聞已歡喜無量歎言善哉時為我說舍利弗言我今出行逢一比丘執持衣鉢入村乞食諸根寂靜威儀詳序我既見已深生恭敬既到其所而問之言我意觀汝似新出家而能如此攝諸情根欲有所問唯願見答汝今大師其名何

支那

釋迦牟尼

五

書五

等有所教誡演說何法時阿捨婆耆即便安詳而見
 答言我之大師得一切種智是甘蔗種天人之師相
 好智慧及神通力無與等者我既年幼學道日淺豈
 能宣說如來妙法然以所知當為汝說即說偈言

一切諸法本 因緣生無主 若能解此者

則得真實道

爾時目犍羅夜那聞舍利弗說此語已即於諸法遠
 塵離垢得法眼淨爾時舍利弗與目犍羅夜那各於
 佛法得甘露已共相謂言我等已於佛法各得利益
 今者宜應共往佛所求索出家作此語已各喚弟子

而語之言我等今者已於佛法得甘露味唯有此法
 是出世道我今欲往求佛出家汝等云何諸弟子等
 答其師言我等今者有所知見皆大師力師若出家
 我悉隨從於是二人即將二百弟子往詣竹園既入
 門已遙見如來相好莊嚴諸比丘眾前後圍繞心大
 歡喜踊躍徧身爾時世尊見舍利弗及目犍羅夜那
 與諸弟子相隨來已告諸比丘汝等當知今此二人
 將諸弟子來至我所欲求出家一名舍利弗二名目
 犍羅夜那當於我法中為上弟子舍利弗者於智慧
 中最為第一目犍羅夜那者於神通中復為無上至

佛所已頭面禮足而白佛言我於佛法已得道跡樂
 欲出家願垂聽許爾時世尊即便呼言善來比丘鬚
 髮自落袈裟著身即成沙門時彼二百弟子既見其
 師成沙門已俱白佛言我等亦欲隨師出家唯願世
 尊垂愍聽許於是世尊即便喚言善來比丘鬚髮自
 落袈裟著身即成沙門爾時世尊為舍利弗及目犍
 羅夜那廣說四諦二人即得阿羅漢果又復為彼二
 百弟子廣說四諦即於諸法遠塵離垢得法眼淨乃
 至亦成阿羅漢果爾時世尊即與一千二百五十比
 丘皆大阿羅漢於摩竭提國廣利眾生諸比丘中多

有人名目犍羅夜那世尊故名此目犍羅夜那為大
 目犍羅夜那普曜經云佛有沙門名曰安陸遺行宣
 法開化未聞五濁之世人在荒迷不達至真入城分
 衛衣服齊整威儀禮節失常法行步安詳因是使
 人見之心悅時舍利弗本字優波替而遙見之心中
 欣然心自念言我學來久未曾覩此沙門衣服安詳
 齊整不失儀節試往問之所奉何道吾常意疑當有
 異聞殊妙之道未必齊此往問比丘所事何道誰為
 師主願聞其志比丘知意即說偈曰
 吾師三界尊 有三十二相 等不存有無

度眾十二門 我年既幼稚 學根近薄甚
 豈能宣至真 如來無極業 一切諸法本
 從緣悉本無 若能反本源 乃名曰沙門
 安陸沙門答曰吾所事師從無數劫奉行六度無極
 之法四等四恩行無盡哀奉無極慈欲度一切積功
 累德不可稱載一生補處在兜術天降神現存寄迦
 維羅衛國處夫人胎如日現水生行七步天地大動
 瑞三十二稱已聖音三界皆苦吾當度之釋梵四主
 咸來啓受九龍浴身其德無量粗舉其要非吾螢燭
 所歎能究悉非心口之所言思是吾大師天人之尊

於是頌曰

吾師天中天 三界無極尊 相好身丈六
 神通遊虛空 化訓去五陰 拔斷十二根
 不貪天世位 心淨開法門
 時舍利弗欣然大悅如冥觀明口言善哉昔來抱疑
 又吾好學八歲從師至年十六靡不周宗行徧天下
 十六大國自謂已達今乃聞異無上正真得吾本願
 今佛所在答曰在迦陵竹園將諸弟子往詣佛所稽
 首足下問訊至尊身墮愚冥迷惑歷載不得諮受今
 乃奉聖無極大道願聽出家得為比丘受成就戒佛

言善哉呼比丘來頭髮自墮袈裟著身佛為說經分別諸法十二根本亘然意達漏盡意解得無著果前白佛言吾有同學俗字拘律陀今名目連少小相順要有至真以相開示今已蒙濟彼沒塵垢未得拔出承尊聖旨往開示之佛言善哉宜知是時勿得稽留時舍利弗稽首佛足辭出入城求目連遙見目連與諸弟子遊行城裏街曲里巷舍利弗趣之目連覩見體改服變不與常同問之所以被服改變有何異見答曰學人無常唯行大明吾學積年不值大聖今乃遇之無上大道欣慶無量故來相求同其道味累劫

無窮目連答曰此非小事善共思惟舍利弗曰不須重言吾狀從事不復欲聞假喻言之人有珍妙施有勝得大寶如意明珠及獲寶瑛復欲反求帛祠為珠非身所欲目連答曰仁智勝我常兄事卿必不相誤便當同志將吾受訓稽首至尊時舍利弗與目連連俱往詣佛稽首佛足退坐一面叉手白佛違曠侍省沉沒塵垢今乃奉覲願為沙門啓受法律佛言善哉即除澡餅屏鹿衣杖具佛呼比丘來頭髮自落袈裟著身為說正諦漏盡意解所作已辦成無著果佛言此二人等往古世時誓供養我待吾道成侍衛左右

今乃相值本有千弟子得舍利弗目連有二百五十比丘一時所度

爾時偷羅厥叉國有一婆羅門名曰迦葉有三十二相聰明智慧誦四毗陀經一切書論無不通達極爲巨富善能布施其婦端正舉國無雙二人自然無有欲想乃至亦不同宿一室久於往昔種善根故不樂在家受五欲樂日夜思惟厭離世間精勤求訪出家之法如是推尋不能得已卽捨家事入於山林心念口言諸佛如來出家修道我今亦當隨佛出家卽便脫去金縷織成珍寶之衣而著價直千兩金壞色納

衣自剃鬚髮爾時諸天於虛空中旣見迦葉自出家已而語之言善男子甘蔗種族白淨王子其名薩婆悉達出家學道成一切種智舉世號爲釋迦牟尼佛今者與千二百五十阿羅漢在王舍城竹園中住爾時迦葉聞天語已歡喜踊躍身毛皆豎卽便往趣竹園僧伽藍爾時世尊知其當來而自思惟觀其善根宜往度之作此念已卽行逆之到多子兜婆而逢迦葉時彼迦葉旣見相好威儀特尊卽便合掌而作此言世尊實是一切種智實是慈悲濟衆生者實是一切所歸依處卽便五體投地頂禮佛足而白佛言世

尊今者是我大師我是弟子如是三說佛即答言如是迦葉我是汝師汝我弟子佛又語言迦葉當知若人實非一切種智而欲受汝為弟子者頭即裂壞以為七分又復告言善哉迦葉快哉迦葉當知五受陰身是大苦聚于時迦葉聞此語已即便見諦乃至得於阿羅漢果爾時世尊即與迦葉俱還竹園以此迦葉有大威德智慧聰明是故名之為大迦葉

爾時世尊告諸比丘言普光如來出興世時善慧仙人豈異人乎即我身是緣路所過五百外道所共論議及隨喜者今此會中優樓頻螺迦葉兄弟及其眷屬千比丘是時賣華女者今耶輸陀羅是善慧仙人髮布地時傍有二人掃佛前地及二百人隨喜助者今此會中舍利弗大目犍連夜那并二百弟子比丘是虛空諸天見善慧仙人以髮布地悉皆隨喜而讚歎者我初得道鹿野苑中始轉法輪八萬天子及頻婆娑羅王所將眷屬八萬那由他人及九十六萬億那由他天是汝等當知過去所種因緣無量劫終不磨滅我於往昔精勤修習一切善業及發大願心不退轉故於今者而已成就一切種智汝等宜應勤修道行無得懈怠時諸比丘聞佛所說歡喜頂戴作禮

而退普曜經云王遙聞子得佛道已來六年生念久
 已心中悲喜饑虛欲覩有一梵志名優陀耶聰明智
 慧本侍菩薩常得其意王告優陀往詣迎佛別闕已
 來十有二年夙夜愁感不捨其心思一相見如復更
 生優陀受教往詣佛所稽首佛足具以王意白佛優
 陀見佛諸天釋梵歸化一切受命前白佛言願得出
 家以為沙門佛言呼比丘來頭髮自墮便成沙門得
 羅漢道佛時所度其餘前後得道所度不可稱計佛
 自念言本與父王要得佛道爾乃還國當度父母今
 正應還設若還國無所感動於事不宜所化數少先

遣神足弟子比丘優陀耶往顯威神足知佛欲往乃
 解道尊咸共渴仰發起道心所度乃多爾時世尊告
 優陀耶佛本出家與父母誓若得佛道還度父母今
 已得佛道德已成必當還國不違本誓汝以神足經
 行虛空現其神變乃知吾身已成大道弟子尚爾況
 佛威德巍巍無量爾乃信受優陀受教神足飛行經
 遊虛空往到本國迦維羅衛城上虛空現無數變身
 上出水身下出火水不濕身火無所傷七現七沒從
 東方沒地出於西方西沒東出南沒北出北沒南出
 行空如鳥沒地如水履水如地王及臣民莫不欣喜

乃知道尊於是頌曰

佛從本所行	生死無數度	常念蜎飛類
勤苦無量劫	時坐佛樹下	逮致本宿願
歡喜當聽說	難得數見聞	適成佛道時
輒降魔官屬	即壞生死本	消愛欲無餘
佛念本生地	意欲見親族	今聽王頭檀
所說甚可悲	比丘名優陀	姿性能悅人
佛遣使令行	孚致消息來	還入父王國
以入宣佛意	今王太子顧	意欲還至宮
優陀聞佛教	即聽受奉行	因時於佛前

變化隨地形	其身忽不見	神足來入城
乃至大王殿	父王所坐前	比丘優陀耶
進現悅頭檀	變化若干品	踊出父王殿
淨譬如蓮華	泥土塵不生	父王見恐怖
即問斯何靈	將無是神祇	出地何怪爾
此形姓為誰	本從何得斯	願以開吾意
令心疑結解	從生至於今	未曾覩是變
太子本棄國	求道度衆生	慕勤無數劫
於今乃得成	今王莫恐畏	且寬意悅豫
我以壞衆惡	為王太子使	王聞太子問

淚下如雨星
 今從吉祥至
 成道號何名
 號曰天中天
 為作眾寶殿
 優陀所答曰
 諸天來歸趣
 皆以錦繡成
 天帝貢袈裟
 在國好美食
 十二年已來
 思寤如更生
 出國坐六年
 三界尊第一
 刻鏤諸妙飾
 佛之正真微
 吾子在宮時
 柔輦有光澤
 不以好衣喜
 甘膳悉其味
 乃承悉達聲
 太子捨國位
 精進現成佛
 本時在我尊
 於今室何如
 常坐於樹下
 茵褥布統絰
 龍妻奉寶牀
 其心無增損
 今所服食者

安身何等類
 呪願布施家
 不敢妄呼覺
 如來三昧定
 皆現稽首受
 香香徧室中
 洗浴除心垢
 悉達在家時
 清淨無垢障
 熏于八難處
 執鉢行分衛
 世世令安隱
 鼓琴發歌音
 夙夜無眠覺
 在家雜香浴
 今用何所意
 其心淨如空
 擣若干雜香
 戒定慧解脫
 世世度十方
 福眾無麤細
 悉達臥寢時
 爾乃令寤起
 釋梵來勸助
 若干種眾馨
 八解三脫門
 普安無惱憂
 香熏其衣服
 以為道德香
 四品好牀座

以若干寶成
四禪為牀座
不著于泥水
左右常擁護
千二百五十
本在家未出
遊行觀四方
觀本見衆心
幢旛羽彫飾
四等慈悲護

重疊布衆具
意定無憤亂
在宮無數兵
日不見惡穢
菩薩無央數
有四品好車
五通以驂駕
遊觀度生死
前後諸導從
恩惠仁愛度

以臥起其上
清淨如蓮華
諸臣而宿衛
諸弟子衆俱
皆來稽首集
象馬牛羊步
徹視洞聽飛
子出行往返
各執諸兵仗
普覆衆危難

以嚴飾衆生
觀者悉填路
椎鳴不死鼓
九十六道伏
啓受心皆明
所化有幾人
化訓諸羣生
在國思正法
莫不承教聞
靡不歸伏者

生時雜妓樂
前後不相害
拘鄰等得道
其音聞三千
所領何國土
悉為歸伏不
十方不可稱
助吾治萬民
佛解空本無
神靜天為業

椎鐘及鳴鼓
樹下波羅柰
八萬四千天
衆生莫不悅
人民為多少
領三千大界
莫不蒙濟度
動順禮節訓
捨于四顛倒
佛與世無離

博無不備達

汝言何不及

一切皆自歸

正天下滿人

一人頭若干

一頭若干舌

舌解無數義

合集恒沙人

嗟歎佛功德

江沙劫不暢

況我螢燭明

王聞益悲喜歎曰善哉善哉阿夷言不妄佛當來不

何日當至乎優陀報曰却七日到王大踊躍即勅羣

臣國中萬民吾往迎佛導從威儀法轉輪王平治道

路掃除令淨香汗灑地懸繒旛綵豎其幢蓋周徧國

內其所修治光飾盡宜千乘萬騎出四十里往奉迎

佛稽首歸命優陀前報王曰本受佛教奉命見王宜

其意故今還宣命說王意旨饑虛無量欲見至尊稽

首受法并化萬民咸蒙福慶王曰宜知是時勿復稽

留爾時優陀耶還來詣佛稽首足下以啓國王世尊

及諸弟子自期七日當還本國王及臣民莫不欣悅

別來積年夙夜想念飲食不甘寢不能寐饑虛日久

計日度時須世尊到已憶七日於時大聖告諸弟子

明日當發至迦維羅衛見於父王皆嚴整衣服護持

應鉢梵釋四王聞佛還國皆來送侍天雨香汁散華

燒香豎諸幢蓋四王諸天皆在前導梵天侍右帝釋

侍左諸比丘眾皆隨佛後諸天龍神華香妓樂追於

上待佛適進路先現瑞應三千國土六反震動百歲
 枯樹皆生華實諸枯竭溪澗自然泉水王見此瑞知
 佛已來勅諸釋種大臣百官皆行詣佛散華燒香豎
 諸幢旛鼓衆妓樂悉出迎佛王遙見佛在於大衆如
 星中月如日初出炤於朝陽如樹華茂芬芳熾盛巨
 身丈六相好嚴身晃如金山王覩悲喜前稽首足惟
 別彌時今乃相見大臣百官皆稽首禮即還入城足
 蹈門闔地爲大動天雨衆華樂器皆鳴盲者得視聾
 者得聽拘蹙得行病者得愈瘖者能言狂者得正僕
 者得伸若被毒者毒爲不行百鳥禽獸相和悲鳴婦

女珠環相椽作聲當爾之時見此變化莫不歡喜室
 寶藏者自然發出中滿珍琦懷異心者皆共和同等
 心叉手自歸命佛諸畜生類蒙其光潤皆得生天懷
 妊母人蒙斯光明苦痛微薄皆得在產端正姝好消
 姪怒癡無復塵勞展轉相視如父如母如兄如弟如
 子如身地獄休息餓鬼飽滿尋光來至歸命世尊皆
 發道意王見佛巨身丈六相好光明體紫金色諸根
 寂定如星中月晃如金山天帝梵王四王所奉覩諸
 梵志久在山中薄露身形日炙風飄身體黑臭在佛
 邊侍猶如黑鳥在紫金山不能發起顯佛大德令一

切悅便勅國中諸豪族釋端正姝好顏貌殊異選五百人出為沙門侍佛在左右猶如鳳凰在須彌山亦如摩尼著水精器時佛弟難陀亦作沙門未下鬚髮難有典作剃頭師前白佛言人身難得佛世難值明時叵遇今我大天及諸尊者識道至高不可限量不慕世榮捨世尊位行作沙門今我小節下劣靡逮何所貪樂不出為道乎唯佛哀愍濟救汗泥沒溺塵埃拔為沙門佛言善哉佛時便呼比丘來頭髮則墮袈裟在身即成沙門禮諸沙門因隨次坐難在後作次第作禮到此沙門即住不禮心自念言是我家僕不

能為禮佛知告難佛法大通舉學前後不在尊卑猶如大海悉受萬川四流不避汗塗執心如地四大俱等地下水火風內外無異其神空淨所著為名宜棄自大以法自將乃應先聖無極道訓時難見佛教誨切至事不得止解了本無棄捐自大下意為禮天地大動眾會同歎善哉善哉為道等心除自高意而下卑心感於天地為之大動從是制法先學為長後學為小法之常儀各無所恨無所諍訟佛時入宮坐於殿上王及臣民日日供養百種甘饌佛說經法所度無量瞿夷携羅云來稽首佛足瞻對問訊久違侍觀曠

廢供養時王僚屬皆懷沉疑太子捐國十有二年何
 從懷妊生子羅云佛語父王告諸羣僚瞿夷守節貞
 潔清淨無瑕疵也設王不信今當現證於時世尊化
 諸眾僧皆使如佛相好光明等無差異於時羅云厥
 年七歲瞿夷即以指印信環與羅云言是汝父者以
 此與焉羅云應時直前詣佛以印信環而投世尊王
 及羣臣咸皆欣躍稱言善哉所現無量真佛子也佛
 語父王及諸臣曰從今已後無復懷疑此吾之子緣
 吾化生勿咎瞿夷也王得道證瞿夷受戒淨修梵行
 宮人大小咸受戒法月六歲三奉齋弗懈國內清寧

風雨以節時不越序五穀登賤民安其所萬邦黎庶
 咸來慶賀道德滋茂如月之初
 祐尋法身無形羣有已滅覺智不起萬動永寂而甫
 現託生降神胎化者何也乘大緣以應俗本誓力以
 弘慈也故能運般若之權任首楞之勢迴靈堯率耀
 化赤澤陶鈞非我利見由物豈言像思議而能語其
 極哉是以攝受羣萌故地居輪皇摧制剛夸故才窮
 藝術斷拔愛網故去國入山顯明法尊故降魔道樹
 凡斯如跡罔非振俗應體圓通隨方變現法身凝湛
 未嘗起滅然世識習滯據跡為真欲觀如來失道逾

遠故涅槃經云若言菩薩在白淨王宮依因父母生
 育是身是魔所說蓋謂證跡而迷本也若本跡雙照
 權實俱明則披經無礙法身可觀

釋迦譜卷第五

音釋

蔚映蔚於物切茂也羽葆葆補道切羽葆幢也幘側革切巾躡彼戟切足

不能替他計切蝟隳緣切鏤郎豆切驂倉舍切

歸安居士嚴爾珪捐貲刻此一千三百零八箇

該銀五兩六錢五分四厘伏願

六根雪淨三障冰清即生啓悟妙心世世弘開

崇禎五年孟春月徑山化城寺識

釋迦譜卷第六

蕭 齊 釋 僧 祐 謨

釋迦在七佛末種姓眾數同異譜第五出阿含經

佛告諸比丘過去九十一劫時世有佛名毗婆尸如

來至真出現于世復次過去三十一劫有佛名尸棄

如來至真出現於世復於彼三十一劫中有佛名毗

舍婆如來至真出現於世復次此賢劫中有佛名拘

樓孫又名拘那含又名迦葉我今亦於賢劫中成最

正覺毗婆尸佛時人壽八萬歲尸棄佛時人壽七萬

歲毗舍婆佛時人壽六萬歲拘樓孫佛時人壽四萬

歲拘那含佛時人壽三萬歲迦葉佛時人壽二萬歲
 我今出世人壽百歲少出多減毗婆尸佛出刹利種
 姓拘利若尸棄佛毗舍婆佛種姓亦爾拘樓孫佛出
 婆羅門種姓迦葉增一阿含云姓頗羅墮拘那含佛
 迦葉佛種姓亦爾我今如來至真出刹利種姓曰瞿
 曇毗婆尸佛坐波羅樹下成最正覺尸棄佛坐分陀
 利樹下成最正覺毗舍婆佛坐娑羅樹下成最正覺
 拘樓孫佛坐尸利沙樹下成最正覺拘那含佛坐烏
 暫樹下成最正覺迦葉佛坐尼拘律樹下成最正覺
 我今如來正真坐鉢多樹下成最正覺

毗婆尸如來三會說法初會弟子有十六萬八千人
 二會弟子有十萬人三會弟子有八萬人尸棄如來
 亦三會說法初會弟子有十萬人二會弟子有八萬
 人三會弟子有七萬人毗舍婆如來二會說法初會
 弟子有七萬人次會弟子有六萬人拘樓孫如來一
 會說法弟子四萬人拘那含如來一會說法弟子三
 萬人迦葉如來一會說法弟子二萬人我今一會說
 法弟子千二百五十人毗婆尸佛有二弟子一名騫
 茶二名提舍諸弟子中最為第一尸棄佛有二弟子
 一名阿毗浮二名三婆婆諸弟子中最為第一毗舍

婆佛有二弟子一名扶遊二名鬱多摩諸弟子中最
 為第一拘樓孫佛有二弟子一名薩尼一名毗樓諸
 弟子中最為第一拘那舍佛有二弟子一名舒槃那
 二名鬱多樓諸弟子中最為第一迦葉佛有二弟子
 一名提舍二名婆羅婆諸弟子中最為第一今我二
 弟子一名舍利弗二名目犍連諸弟子中最為第一
 毗婆尸佛有執事弟子名曰無憂尸棄佛執事弟子
 名曰忍行毗舍婆佛有執事弟子名曰寂滅拘樓孫
 佛有執事弟子名曰善覺拘那舍佛有執事弟子名
 曰安和迦葉佛有執事弟子名曰善友我執事弟子

名曰阿難毗婆尸佛有子名曰方友尸棄佛有子名
 曰無量毗舍婆佛有子名曰妙覺拘樓孫佛有子名
 曰上勝拘那舍佛有子名曰導師迦葉佛有子名曰
 進軍今我有子名曰羅睺羅毗婆尸佛父名槃頭剎
 利王種母名槃頭婆提王所治城名槃頭波提尸棄
 佛父名明相剎利王種母名光曜王所治城名曰光
 相毗舍婆佛父名善澄剎利王種母名稱戒王所治
 城名曰無喻拘樓孫佛父名禮得婆羅門種母名善
 枝王名安和隨王名故城名安和拘那舍佛父名肉
 德婆羅門種母名善勝是時王名清淨隨王名故城

名清淨迦葉佛父名曰梵德婆羅門種母名財主是時王名婆毗王所治城名波羅柰釋迦文佛父名淨飯刹利王種母名大清淨妙王所治城名迦毗羅衛觀佛三昧經云毗婆尸佛身長六十由旬圓光百二十由旬尸棄佛身長四十二由旬圓光四十五由旬通身光一百由旬毗舍婆佛身長三十二由旬圓光四十二由旬通身光六十二由旬拘留孫佛身長二十五由旬圓光四十二由旬通身光五十由旬拘那含牟尼佛身長二十五由旬圓光三十由旬通身光長四十由旬迦葉佛身長十六丈釋迦牟尼佛身長

丈六圓光七尺七佛身金紫金色

祐壽七佛相次化跡各殊夫法身平等非有優劣眾生業異故現應不同耳是以釋迦出世身相紫金而一千比丘咸見赭容十六信士偏覩灰色自彼見異佛恒壹也類此而言可無惑矣

釋迦同三千佛緣譜第六出藥王藥上觀經

釋迦牟尼佛告大眾言我昔無數劫時於妙光佛末法之中出家學道聞五十三佛名聞已合掌心生歡喜復教他人令得聞持他人聞已展轉相教乃至三千人此三千人異口同音稱諸佛名一心敬禮以是

因緣功德力故即得超越無數億劫生死之罪其千
 人者華光佛為首下至毗舍於莊嚴劫得成佛道過
 去千佛是也此中千佛者拘樓孫佛為首下至樓至
 如來於賢劫中次第成佛後千佛者日光如來為首
 下至須彌相於星宿劫中當得成佛現在十方諸佛
 善德如來等亦得聞是五十三佛名故於十方世界
 各得成佛過去五十三佛名在藥王藥上觀經三千
 佛名在諸佛集功德華經千佛名號國土種姓父母
 弟子眷屬聚會年歲在賢劫經釋迦在賢劫中千佛
 第四成佛

祐仰惟大覺之緣感也至矣極矣夫聞名致敬則勝
 業肇於須臾憑心相化則妙果成於曠劫故五十三
 聖聲喚微塵之前三千至真光鑠恒沙之後雖合掌
 之因似賒而樹王之報漸及禮拜稱讚豈虛業哉
 釋迦內外族姓名譜第七 出長阿含經
 釋種尸休羅王有四子 此出彌沙塞律案長阿含經
 頰生淨飯主 曇無德律大智論並云師子
 一名淨飯 大智論同十二遊經云菩薩父名白淨王
 二名白飯 大智論同十二遊經云菩薩叔父名甘露淨王
 三名斛飯 大智論同十二遊經云菩薩中叔名穀淨王

四名甘露飯

大智論同十二遊經云菩薩小叔名設淨王

淨飯有二子一名菩薩

大智論同十二遊經云白淨王有二子其太子名悉達

二名難陀

大智論同十二遊經云其小子名難陀

白飯有二子一名阿難

二名調達大智論云白飯二子跋提提沙十二

遊經云甘露淨王有二子長子名調達小子名阿難

斛飯有二子一名摩訶男

二名阿那律大智論云斛飯二子提婆

達多阿難十二遊經云穀淨王有二子太子名釋摩納小子名阿那律

甘露飯有二子一名婆婆

二名拔提大智論云甘露飯二子摩訶男

阿泥盧豆有一女名甘露味雜阿舍云提沙比丘是佛姑子兄弟十二遊經云設淨王有二子太子名釋迦王子名釋沙王尋此四王名號次序及生子名

字互有同異正其然否寄之來哲其淨飯白淨真淨

悅頭檀輸頭檀眾經名各不同蓋是譯出致異即是人耳阿泥盧豆即阿那律推例而求類多如此

調達四月七日食時生身長丈五四寸

出十二遊經

菩薩四月八日夜半明星出時生身長丈六

出十二遊經

佛弟難陀以四月九日生身長丈五四寸

出十二遊經

阿難以四月十日生身長丈五三寸

出十二遊經

菩薩外家去迦惟羅閱城

晉言八百里姓瞿曇氏作妙德

小王主百萬戶名一億主

出十二遊經釋迦託生王下又云菩薩母名摩耶難陀

母名僑曇彌即大愛道也

菩薩婦家姓瞿曇氏舍夷長者名水光其婦名月女

有一城居近其邊生女之時日將欲沒餘明照其家

室內皆明因字之為瞿夷瞿夷晉言明女瞿夷是太子第一

夫人出十二遊經

太子第二夫人生羅云者名耶惟檀其父名移施長

者祐按瑞應本起善權衆經及大智論並云羅睺羅是瞿夷所生而十二遊獨云是第三夫人子從多斷則宜以瑞應為正

第三夫人名鹿野其父名釋長者以有三婦故父王

為立三時殿殿有二萬姝女出十二遊經以太子當作遮迦王晉

飛行故三殿置六萬姝女出十二遊經

皇帝故三殿置六萬姝女出十二遊經

祐觀大覺俯應跡均俗典所以胤裔繼哲姻婭重明

金緣發曠劫故能讚靈化耳

釋迦弟子姓釋緣譜第八出增一阿舍經

佛告諸比丘有四大河水從阿耨達泉出云何為四

所謂恒伽新頭婆叉私陀波恒伽水東流牛頭口出

新頭南流師子口出私陀西流象口中出婆叉北流

從馬口出是時四大河水繞阿耨達泉已恒伽入東

海新頭入南海婆叉入西海私陀入北海爾時四大

河入海已無復本名字同名為海此亦如是有四姓

云何為四刹利婆羅門長者居士種於如來所剃除

鬚髮著三法衣出家學道無復本姓但言沙門釋迦

子所以然者如來衆者其猶大海四諦其如四大河

除其結使入於無畏涅槃城是故諸比丘諸有四姓
 剃除鬚髮以信堅固出家學道者彼當滅本名字自
 稱釋迦弟子所以然者我今正是釋迦子從釋種中
 出家學道比丘當知欲論生子之義者當名沙門釋
 種子之所以然者生皆由我生從法起從法成是故
 比丘當求方便得作釋種子如是諸比丘當作是學
 彌沙塞律云汝等比丘雜類出家皆捨本姓稱釋子
 沙門長阿含經云彌勒出世諸比丘弟子皆稱慈子
 如我今弟子稱爲釋子
 祐尋四河入溟俱名爲海四族歸道金號曰釋可謂
 總彼殊源同乎一味者矣

釋迦四部名聞弟子譜第九

比丘一百人出增一阿含經

佛言我聲聞弟子中第一初受法味思惟四諦寬仁
 博識善能勸化將養聖衆不失威儀即阿若拘隣比
 丘善能勸導福度人民即優陀夷比丘速成神通中
 不有悔即摩訶男比丘恒飛虛空足不踏地即善肘
 比丘乘虛教化意無榮冀即婆破比丘居樂天上不
 處人中即牛跡比丘恒觀惡露不淨之想即善勝比
 丘將護聖衆四事供養即優留毗迦葉比丘心意寂
 然降伏諸結即江迦葉比丘觀了諸法都無所著即
 象迦葉比丘威容端正行步詳序即馬師比丘智慧

無窮決了諸疑卽舍利弗比丘神足輕舉飛到十方
 卽大目犍連比丘勇猛精勤堪任苦行卽二十億耳
 比丘十二頭陀難得之行卽大迦葉比丘天眼第一
 見十方域卽阿那律比丘坐禪入定心不錯亂卽離
 越比丘能廣勸率施立齋講卽陀羅婆摩羅比丘安
 造房室與招提僧卽小陀羅婆摩羅比丘是貴豪種
 族出家學道卽羅吒婆羅比丘善分別義敷演道教
 卽大迦梅延比丘堪任受籌不違禁法卽軍頭婆歎
 比丘降伏外道履行正法卽賓頭盧比丘四事供養
 衣被飯食又瞻視疾病供給醫藥卽識比丘言論辯

了而無疑滯又能造偈誦歎如來德卽謂鵬耆舍比
 丘得四辯才觸難答對卽摩訶拘絺羅比丘清淨閑
 居不樂人中卽堅牢比丘乞食耐辱不避寒暑卽難
 提比丘獨處靜坐專意念道卽金毗羅比丘一坐一
 食不移于處卽施羅比丘守持三衣不離食息卽浮
 彌比丘樹下坐禪意不移轉卽狐疑離越比丘苦身
 露坐不避風雨卽婆蹉比丘獨樂空閑專善思惟卽
 陀素比丘著五納衣不著榮飾卽泥婆比丘常樂塚
 間不處人中卽優多羅比丘恒坐草蓐越福度人卽
 盧醯窣比丘不與人語視地而行卽優鉗摩居江比

丘坐起行步常入三昧即那提比丘好遊遠國教授
 人民即曇摩留支比丘喜集聖眾論說法味即伽架
 比丘壽命極長終不中天常樂閑居不處眾中即婆
 拘羅比丘能廣說法分別義理即滿願子比丘奉持
 戒律無所觸犯即優波離比丘得信解脫意無猶豫
 即婆迦利比丘天體端正與世殊異諸根寂靜心不
 變易即難陀比丘辯才卒起解人疑滯即婆陀比丘
 能廣說義理不有違即斯尼比丘喜著好衣行本清
 淨即天須菩提比丘常好教授諸在後學即難陀迦
 比丘善誨禁戒比丘尼僧即須摩那比丘功德盛滿

所適無短即尸婆羅比丘具足眾行道品之法即優
 波先迦蘭陀子比丘所說和悅不傷人意即婆陀先
 比丘修行安般思惟惡露即摩訶迦延那比丘計我
 無常心無有想即優頭盤比丘能雜種論暢悅心誠
 即拘摩羅迦葉比丘著弊惡衣無所羞恥即面王比
 丘不毀禁戒誦讀不懈即羅云比丘以神足力能自
 隱暗即般菟比丘能化形體作若干變即周利般菟
 比丘豪族富貴天性柔和即釋王比丘乞食無厭教
 化無窮氣力強盛無所畏難即婆提婆羅比丘音響
 清徹聲至梵天即羅婆那婆提比丘身體香潔熏干

四方即鴛迦闍比丘知時明物所至無疑所憶不忘
 多聞廣遠堪任奉上即阿難比丘莊嚴服飾行步顧
 影即迦持利比丘諸王敬待羣臣所宗即月光比丘
 天人所奉恒朝侍省以捨人形像天之貌即輸提比
 丘諸天師導指授正法即天比丘自憶宿命無數劫
 事即果衣比丘體性利根智慧深遠即鴛拈魔比丘
 能降伏魔外道邪業即僧迦魔比丘入水三昧不以
 為難廣有所識人所敬念即質多舍利弗比丘入火
 三昧普照十方即善來比丘能降伏龍使奉三尊即
 那羅陀比丘降伏鬼神改惡修善即鬼地比丘降乾

沓和勤行善行即毗盧遮比丘恒樂空定分別空義
 志在空寂微妙德業即須菩提比丘行無想定除去
 諸念即耆利摩難比丘入無願定意不起亂即炎盛
 比丘入慈三昧心無恚怒即梵摩達比丘入悲三昧
 成就本業即須彌比丘得喜行德無若干相即婆彌
 陀比丘常守護心意不捨離即躍波迦比丘行炎盛
 三昧終不解脫即曇彌比丘言語麤獷不避尊貴入
 金光三昧即比利陀婆遮比丘入金剛三昧不可沮
 壞即無畏比丘所說決了不懷怯弱即須泥多比丘
 恒樂寂靜意不處亂即陀摩比丘義不可勝終不可

伏即須羅他比丘曉了星宿豫知吉凶即那伽波羅
 比丘恒喜三昧禪悅為食即婆私吒比丘常以法喜
 為食即謂須夜奢比丘恒行忍辱對至不起即滿願
 盛明比丘修習日光三昧即彌奚比丘明算術法無
 有差錯即尼拘留比丘分別等智恒不忘失即鹿頭
 比丘得雷電三昧不懷恐悚即地比丘觀了身本即
 頭那比丘最後取證獲得漏盡即須拔比丘
 名聞比丘尼五十人

久出家學國王所敬即大愛道瞿曇彌尼智慧聰明
 即識摩尼神足第一感致諸神即優鉢華色尼行頭

陀法無一限礙即機利舍瞿曇彌尼天眼第一所照
 無礙即奢拘利尼坐禪入定意不散即奢摩尼分
 別義趣廣演道教即波頭蘭闍那尼奉持律教無所
 加犯即波羅遮那尼得信解脫不復退還即迦梅延
 尼得四辯才不懷怯弱即最勝尼自識宿命無數劫
 事即拔陀迦毗離尼顏色端正人所愛敬即醯摩闍
 尼降伏外道立以正教即輸那尼分別義趣廣說分
 部即曇摩提那尼著麤弊衣不以為愧即優多羅尼
 諸根寂靜恒若一心即光明尼衣服齊整常如法教
 即禪頭尼能雜種論亦無疑滯即檀多尼堪任造偈

支那

釋迦譜卷六

七

書六

讚如來德卽天與尼多聞廣博恩惠接下卽瞿卑尼
 恒處閑靜不居人間卽無畏尼苦體乞食不擇貴賤
 卽毗舍佉尼一處一坐終不移易卽拔陀婆羅尼徧
 行乞求廣度人民卽摩怒訶利尼速成道果中間不
 滯卽陀摩尼執持三衣終不捨離卽須陀摩尼恒坐
 樹下意不改易卽瑒須那尼恒居露地不念覆蓋卽
 奢陀尼樂空閑處不在人間卽優迦羅尼長坐草蓐
 不著裝飾卽離那尼著五納衣以次分衛卽阿奴波
 摩尼樂空塚間卽優伽摩尼多遊於慈愍念生類卽
 清明尼悲泣衆生不及道者卽素摩尼喜得道者願

及一切卽摩陀利尼護守諸行意不遠離卽迦羅伽
 尼守虛執空了定無有卽提婆修尼心樂無想除去
 諸著卽日光尼修習無願心恒濟物卽末那婆尼諸
 法無疑度人無限卽毗摩達尼能廣說義分別深法
 卽普照尼心懷忍辱如地容受卽曇摩提尼能教化
 人使立檀會辦具牀座卽須夜摩尼心已永息不興
 亂想卽因提闍尼觀了諸法而無狀足卽龍尼意強
 勇猛無所染著卽拘羅那尼入水三昧普潤一切卽
 婆須尼入火光三昧悉照萌類卽降提尼觀惡露不
 淨分別緣起卽遮波羅尼育養衆人施與所乏卽守

迦尼最後取證即拔陀軍陀羅拘夷國尼
名聞優婆塞四十人

初聞法藥成聖賢證即三果商客第一智慧即質多
長者神德第一即乾提阿藍降伏外道即掘多長者
能說深法即優波掘長者恒坐禪思即訶侈阿羅婆
降伏魔官即勇健長者福德盛滿即闍利長者大檀
越主即須達長者門族成就即泯逸長者好問義趣
即生漏婆羅門利根通明即梵摩喻諸佛信使即御
馬摩納訖身無我即喜聞琴婆羅門論不可勝即毗
裘婆羅門言語速疾能造偈頌即優波離長者喜施

好寶不有吝心即殊提長者建立善本即優迦毗舍
離能說妙法即最上無畏優婆塞所說無畏善察人
根即頭摩大將領毗舍離好喜惠施即餅沙王所施
狹少即光明王建立善本即波斯匿王得無根善信
起歡喜心即阿闍世王至心向佛意不變易即優填
王承事正法即月光王子供奉聖眾意常平等即造
祇洹王子常喜濟彼不自為已即師子王子顏貌端
正與人殊勝即雞頭王子善恭奉人無有高下即無
畏王子恒行慈心即不尼長者心恒悲念一切之類
即摩訶納釋種常行喜心即拔陀釋種恒行護心不

失善行卽毗闍先優婆塞堪任行忍卽師子大將能
雜種論卽毗舍御優婆塞賢聖默然卽難提波羅優
婆塞勤修善行無有休息卽優多羅優婆塞諸根寂
靜卽天優婆塞最後受證卽拘夷那竭摩羅

名聞優婆夷三十人

初受道證卽難陀難陀婆羅優婆夷智慧第一卽久
壽多羅優婆夷恒喜坐禪卽須毗耶女優婆夷慧根
了了卽毗浮優婆夷堪能說法卽鶖竭闍優婆夷善
演經義卽跋陀婆羅須焰摩優婆夷降伏外道卽婆
修陀優婆夷音響清徹卽無憂優婆夷能種種論卽

婆羅陀優婆夷勇猛精勤卽須頭優婆夷第一供養
如來卽摩利夫人承事正法卽須賴婆夫人供養聖
衆卽捨彌夫人瞻視當來過去賢士卽月光夫人檀
越第一卽雷電夫人恒行慈三昧卽摩訶先優婆夷
行悲哀愍卽毗提優婆夷喜心不絕卽拔陀優婆夷
行守護業卽難陀母優婆夷得信解脫卽照曜優婆
夷恒行忍辱卽無憂優婆夷行空三昧卽毗讐先優
婆夷行無想三昧卽優那陀優婆夷行無願三昧卽
無垢優婆夷好教授彼卽尸利夫人優婆夷善能持
戒卽鶖竭摩優婆夷形貌端正卽雷炎優婆夷諸根

寂靜即最勝優婆夷多聞博智即泥羅優婆夷能造
頌偈修摩迦那無所怯弱即須達女優婆夷最後取
證優婆夷者即藍優婆夷

祐歷觀學者業盛則聲流其在悠悠未足算也故十

大弟子以第一為標四部之眾以名聞自顯所謂眾

所知識出于其類者也嗟夫後進思自勗焉比丘比丘尼優

婆夷三衆數中各長一人

釋迦從弟調達出家緣記第十出中本

是時父王往詣佛所見迦葉千人形體至陋每心不

平此等比丘雖復心精無表容貌當勸宗室樂無為

者令作沙門擇取端正即令宗族明日會殿受命即

到王告宗室曰阿夷相言佛不出家當作聖王君四

方天下左右侍從率皆端正今諸弟子類無姿觀欲

聘有道儀容足者充備僧數光暉世尊咸言大善聽

令歡喜乞退嚴辦七日乃行調達便告行者吾等王

者子弟今棄世榮出家居道整頓服飾極世之妙象

馬車乘價直萬金其日嚴出觀者填路調達冠幘自

然墮地衢和離所可乘象四脚布地而作鳥鳴相工

占曰餘皆得道一人不吉俱詣佛所求作沙門剛強

降伏莫不樂受調達亦名提婆達多齊言天熱以其

生時人天心皆忽驚熱故因爲名增一阿舍經云提婆達兜白佛言願聽在道次佛言汝宜在家分檀惠施夫爲沙門實爲不易復再三白復告不宜出家提婆達兜便生惡念此沙門懷嫉妬心我今宜自剃頭善修梵行何用是沙門爲提婆達兜後犯五逆罪惡心欲至如來所適下足在地地中有大火風起生繞提婆達兜身爲火所燒便發悔心稱南無佛然不究竟適得稱南無便入地獄中阿難悲泣言提婆達在地獄中爲經幾時佛言經一太劫命終生四天王上展轉至他化自在天經六十劫不墮三惡趣最後受

身成辟支佛名曰南無由命終之時稱南無故時大目犍連言我欲至阿鼻獄中見提婆達慰勞慶賀佛言阿鼻罪人不解人間音響目連白言我解六十四音當以此音往語彼人目連如屈伸臂頃至阿鼻獄上虛空中曰提婆達兜獄卒曰此間亦有拘樓秦佛迦葉佛時提婆達兜今命何者目連曰吾命釋迦文佛叔父見提婆達兜獄卒燒炙彼身使令覺悟曰汝仰觀空中見大目連坐寶蓮華語目連曰尊者何由屈此目連曰如來記汝欲害世尊緣入阿鼻最後成辟支佛號名南無提婆達聞已歡喜言我今日以右

脅臥阿鼻獄中經歷一劫終無勞倦日連復問苦痛
有增損乎提婆達報以熱鐵輪輾我身壞復以鐵杵
咬咀我形有黑暴象蹈蹋我體復有火山來鎮我面
昔日袈裟化為銅鏢極為熾然今寄頭面禮世尊足
復禮尊者阿難目連即攝神足還世尊所大智論稱
提婆達弟子俱迦離謗舍利弗及目捷連命終墮蓮
華地獄中即衢和離也祐拾檢調達之歷緣也亟為
戚屬恒結仇讐豈以標明善惡影響秘教乎是故經
言若言提婆達多造逆罪墮阿鼻者無有是處斯乃
諸佛境界非二乘所測也

釋迦從弟阿那律跋提出家緣記第十一山曇無德律
釋種兄弟二人一名摩訶男一名阿那律阿那律者
其母愛念常不離目前與作三時殿姝女娛樂摩訶
男言諸釋多出家而我一門獨無兄營家業弟當出
家若不能者弟營家業兄當出家那律以家事煩碎
遂欲出家往白其母乞求出家乃至三反母不聽許
種種方便斷之以釋種有跋提其母愛重必不聽出
家便言若跋提出家者當聽汝耳那律便求跋提跋
提不許復種種方便云我今出家一由汝耳跋提遂
許還求其母其母亦不許復作方便言若阿那律母

天那
聖加
六

許兒者當聽汝耳遂兩彼許跋提言且當七年受五
欲樂然後出家那律言人命無常難可得保不宜淹
留更求一年乃至七日那律許之過七日已釋子等
八人及優波離第九各好莊嚴乘寶象馬出迦毗羅
衛齊至其界脫其寶衣以象馬付優波離令還語言
汝常依我等以自存活今者出家以此寶衣大象相
遺與自資生遂便前去優波離思惟亦欲隨出家便
卽以寶衣等懸著樹上念言其有來取之者與之於
是便共至佛所求索出家言我父母已許願聽出家
乞先度優波離何以故以除我等憍慢心故爾時世

尊先度優波離次度那律次度跋提次更度難提次
度金毗羅次度難陀等六人優波離受大戒最爲上
座時有大上座名毗羅茶別度阿難陀餘次上座度
跋難陀及調達時跋提獨在樹下塚間思惟夜分過
已高聲稱言甚樂其邊比丘白佛佛呼跋提問何故
自言甚樂耶跋提言我本在家時內外常以刀杖而
自衛護猶有恐懼念念憂畏今獨塚間無有恐懼身
毛不豎我念出離之樂故稱甚樂佛言善哉
祐以爲俗滯難啓而法緣易感一釋蘄道尅意實深
故始也互塞終然兩開矣夫苦逼不生是謂至樂林

下之唱豈外適哉

釋迦從弟孫陀羅難陀出家緣記第十二出普曜經

佛在迦維羅竭國尼拘類園將侍者阿難入城乞食童子難陀在高樓上遙見卽下來至佛所作禮自言如來之姓轉輪聖王何謂自辱持鉢乞食自取佛鉢入家內盛甘美飲食佛卽還尼拘類園卽語侍者難陀若出勿自取鉢勅語難陀躬自送來難陀受教從後送鉢婦出語言速還勿久須還乃食前進未久重更遣信時還勿停所以鄭重恐出家故難陀至佛所手自奉鉢唯願時受今欲還家佛告難陀卿已至此

今宜剃除鬚髮服三法衣何爲欲還是時如來以威神力逼迫難陀度令出家閉在靜室久久之後次第當直難陀歡喜我今當直事因此閑暇逃走還家是時難陀隨所應作事事不闕天神侍衛難陀汲水至滿自然飄棄淨地之中草土更滋關閉門戶戶自然開難陀自念我家王種多饒財寶設有漏失卽可償之今當竊隨小徑還家行大塗者儻值如來卽脫三法衣更被餘衣而去行未經時正值如來奔趣大樹欲自隱身佛神力故樹神拔樹懸在虛空難陀入樹根處隱蔽自身如來尋往問言何爲至此默然慚愧

佛再三告汝欲何趣難陀言暫欲還家與婦相見佛告難陀夫人學道貪著欲心不顧後世燒身之禍我今將汝天上遊觀宜自專心勿懷恐怖佛以神力接至天上見一宮殿眾寶莊嚴玉女營從不可稱計唯無夫主難陀問佛此何天宮種種娛樂快樂昔所未見而無夫主唯願說之佛告難陀汝可自問難陀奉教自往問之天女答曰汝不知乎迦維羅竭國釋迦文佛金父弟難陀後當生此爲我夫主難陀聞之密自歡喜還至佛所具以白佛佛告難陀快修梵行如是不久當來至此受福自然是時世尊復以神力接

引難陀將至地獄路經鐵圍山表見瞎獼猴佛問難陀汝婦孫陀利何如瞎獼猴難陀白佛止止勿復說此孫陀利者女中英妙百千萬倍豈得類乎佛言以孫陀利比諸天女亦億千萬倍不可爲比於是世尊復接難陀徧至地獄見種種苦痛有一大鑊獄卒圍繞湯沸火熾不見罪人難陀白佛是何人獄不見罪人佛言汝自問之難陀往問獄卒報言閻浮利地真淨王家兒得成佛道金父弟甘露王兒名曰難陀爲人放逸姪欲情多自恃豪族輕忽萬民彼命終後當來此中難陀聞已衣毛皆豎顏色變異往趣世尊白

言唯然大師三界大護今覩此變倍懷恐懼求離地獄願說泥洹爾時世尊漸與難陀說微妙法安處無為令至道場

雜寶藏經云佛在迦毗羅衛國入城乞食到難陀舍會值難陀與婦作糝香塗眉間聞佛門中欲出外看婦共要言出看如來使我額上糝未乾頃便還入來難陀即出見佛作禮取鉢向舍盛食奉佛佛不為取過與阿難阿難亦不為取阿難語言汝從誰得鉢還與本處於是持鉢詣佛至尼拘樓精舍佛即勅剃師與難陀剃髮難陀不肯怒拳而語剃髮人言迦毗羅

衛一切人民汝今盡可剃其髮也佛問剃髮者何以不剃答言畏故不敢為剃佛共阿難自至其邊難陀畏故不敢不剃雖得剃髮恒欲還家佛常將行不能得去後於一日次守房舍而自歡喜今真得便可還家去待佛眾僧都去之後我當還家佛入城後作是念言當為汲水令滿澡餅然後還歸尋時汲水一餅適滿一餅復翻如是經時不能滿餅便作是言俱不可滿使諸比丘來還自汲我今但著餅屋中而棄之去即閉房門適一扇閉一扇復開適閉一戶一戶復開更作是念俱不可閉就置而去縱使失諸比丘衣

物我饒財寶足有可償即出僧房而自思惟佛必從此來我則從彼異道而去佛知其意亦異道來遙見佛來大樹後藏樹神舉樹在虛空中露地而立佛見難陀將還精舍而問之言汝念婦也答言實爾即將難陀向阿那波山上又問難陀汝婦端正不答言端正山中有一老瞎獼猴又復問言汝婦孫陀利面首端正何如此獼猴也難陀懊惱便作念言我婦端正人中少雙佛今何故以我之婦比瞎獼猴佛復將至切利天上徧諸天宮而共觀看見諸天子與諸天女共相娛樂見一宮中有五百天女無有天子尋來問

佛佛言汝自往問難陀往問言諸宮殿中盡有天子此中何以獨無天子諸女答言閻浮提內佛弟難陀佛逼使出家以出家因緣命終當生於此天宮為我天子難陀答言即我身是便欲即住天女語言我等是天汝今是人還捨人壽更生此間便可得往便還佛所以如上事具白世尊佛語難陀汝婦端正何如天女難陀答言比彼天女如瞎獼猴比於我婦佛將難陀還閻浮提難陀為欲生天故勤加持戒阿難爾時為說偈言

譬如羯羊鬪 將前而更却 汝為欲持戒

其事亦如是

佛將難陀復至地獄見諸鑊湯悉皆煮人唯見一鑊
炊沸空停怪其所以而來問佛佛告之言汝自往問
難陀卽往問獄卒言諸鑊盡皆煮治罪人此鑊何故
空無所煮答言閻浮提內有如來弟名爲難陀以出
家功德當得生天以欲罷道因緣之故天壽命終墮
此地獄是故我今炊鑊而待難陀難陀恐怖畏獄卒
留卽作是言南無佛陀南無佛陀唯願將我擁護還
至閻浮提內佛語難陀汝勤持戒修汝天福難陀答
言不用生天今唯願我不墮此獄佛爲說法一七日

中成阿羅漢諸比丘歎言世尊出世甚奇甚特佛言
非但今日乃往過去亦復如是諸比丘言過去亦爾
其事云何請爲我說佛言昔迦尸國王名曰滿面比
提希國有一姪女端正殊妙爾時一國常想怨嫉傍
有佞臣向迦尸王歎說彼國有姪女端正世所希少
王聞是語心生惑著遣使從索彼國不與重遣使言
求暫相見四五日間還當發遣時彼國王約勅姪女
汝之姿態所有伎能好悉具備使迦尸王惑著於汝
須臾之間不能遠離卽遣令去經四五日尋復喚言
欲設太祀須得此女暫還放來後當更遣時迦尸王

卽遣歸還太祀已訖遣使還索答言明白當遣既至
明日亦復不遣如是妄語經歷多日王心惑著單將
數人欲往彼國諸臣勸諫不肯受用時仙人山中有
獼猴王聰明博達多有所知其婦適死取一雌獼猴
諸獼猴衆皆共瞋訶責此姪獼猴衆所共有何緣獨
當時獼猴王將雌獼猴走迦尸國投於王所諸獼猴
衆皆共追逐既到城內發屋壞墻不可料理迦尸國
王語獼猴王言汝今何不以此雌獼猴還諸獼猴獼猴
王言我婦死去更復無婦王今云何欲使我歸王語
之言今汝獼猴破亂我國那得不歸獼猴王言此事

不好耶王答言不好如是再三王故言不好獼猴王
言汝宮中有八萬四千夫人汝不愛樂欲至敵國追
逐姪女我今無婦唯取此一汝言不好一切萬姓視
汝而活爲一姪女云何捐棄大王當知姪欲之事樂
少苦多猶如逆風而執熾炬愚者不放必見燒害欲
爲不淨如彼屎聚欲現外相薄皮所覆欲無反復如
屎塗毒蛇欲如怨賊詐親附人欲如假借必當還歸
欲爲可惡如廁生華欲如疥瘡而向於火把之轉劇
欲如狗噬枯骨涎唾共合謂爲有味唇齒破盡不知
獸足欲如渴人飲於鹹水逾增其渴欲如段肉衆鳥

競逐欲如魚獸貪味至死其患甚大爾時獼猴王者
 我身是也爾時王者難陀是也爾時姪女者孫陀利
 是也我於爾時欲淤泥中拔出難陀今亦拔其生死
 之苦

釋迦譜卷第六

音釋

騫丘虔切 赭止野切 咬咀咬奉甫切
 歸安居士巖爾珪捐貲刻此 八百五十一箇
 該銀四兩九錢二分六厘 伏願
 六根雪淨三障水清即生啓悟妙心世世弘開
 道眼 龍山釋海瓊對
 崇禎五年 孟春月徑山化城寺識



